

Ciù concreta a l'é a seconda che, comme e proscime, de seguo a l'é stæta fæta in scî sentê commerciali che passavan li da vixin. A l'ea stæta determinâ da-e guære romano-galliche, romano-liguri e puniche into II secolo a.C. A l'é stæta costrûia into 239 a.C. da Caio Aurelio Cotta; dæto che poi l'é vegnuo meno a necessitæ d'uso, in pöchi anni a natúa a l'à fæto "scomparî" tutto quanto. Cronologicamente, tra questa stradda cho e a successiva, se ghe mette de mezo a Postumia, inti anni 148 a.C., ch'a l'univa Piaxensa a-o ... mā. Puntin de sospencion, perché anche pe questa existan de differense de valutassion: pöchi a veddan passâ da Acqui a Sann-a e quindi sâta Zena (faxendo un tutt'un con quella Julia). I ciù numerosi a veddan arrivâ a-a Bocchetta, chinâ a Pontedeximo e proseguî lungo o torrente Ponçevia (a preuva storica a l'é basâ in sciâ Tôa do Ponçevia ch'a çita a "Postumia" træ vötte). Ma no basta: pe quarchedun, a Rioeu a stradda a giava verso ponente (Fegin-Sestri) sâtando San Pê d'Ænn-a e anche Zena perché a l'ea 'na stradda militare. Altri invece a collegan a-o pòrto, e quindi determinante pe-o tema proposto; ma se basan sovia i pöchi reperti romani, e a fan "xoâ" da Fegin a San Tomaxo (antiga gixa in ciassa do Principe, òua destruta). Scrivo xoâ, perché inte cartinn-e allegæ a-i libbri, o percorso ch'o l'é segnou o passa pe San Pê d'Ænn-a; ma inti tèsti, próprio no se ne parla. De stradde, ne esiste unn-a quarta do 13 a.C. (dita Julia Augusta, ma ch'a l'à interessou solo a Liguria de ponente, da Vintimiggia a Sann-a - da li - a Acqui-Tortonn-a) e ben ben de atre medievali, testimoniæ anche da-a "carta Peutingeriana".

#### ILLUSTRAZIONI

a p. 8 disegni tratti dai bassorilievi della Colonna Antonia

a p. 9 *Tabula Peutingeriana - pars IV - segmentum IV*. Parte delle zone Apuane con le colonie di Pisa, Lucca e Luni. Il tratto Pisa-Luni non è ancora collegato.



rianâ" do 335 d.C. In generale son vegie stradde refæte, ma importanti perché de queste se treuvan, ancon ancheu, tanti reperti (insediamenti, ponti træti de stradda a-i quæ fan riferimento e stradette ancon ciammæ via Romana de Quinto, de Quarto, de Pegi, ecc.).

Quindi, siben che seggian no guæi segue, e vestigia romane ean a san Tomaxo (òua destruta) e a Fegin (unn-a fabbrica de ceramiche); into mezo, no n'existan. Alloa, passava a stradda romana pe San Pê d'Ænn-a o gh'ea solo di sentê locali? I Storici veuan preuve; e preuve no ghe n'é. Ma negâ tutto me pâ un pö tröppo. Così, a rispôsta a-a domanda a l'é basâ solo in sce due poscibilitæ: a primma «No se sa, e quindi bezeugna no esprimmise»; oppure accettâ ipotexi ma solo de presunission, basæ sorvia unn-a "lögica analitica" ch'a fa individuâ duî percorsci: tutti duî, da san Tomaxo, van sciù pe l'attuale montâ di Angei e - in çimma - un: o va in cresta verso o Granaieu se o percorso o l'anava a nord; l'atro: o proseguiva in còsta (coi nommi d'ancheu saieiva via a-a Porta di Angei-montâ Bersezio; a passava erta in sciâ spiaggia, da Prementon e Belvedere) e a chinava a-a "Pría", unico toponimo ch'o l'existe ma che nisciun - de quelli che han scrîto da stradda - o l'à piggiou mai in consinderassion, pe an-a a attraversâ o torrente Ponçevia. A stöia de unn-a San Pê d'Ænn-a romana a porieiva êse spiegâ solo da quest'urtima prospettiva.

Spero che i «"Stòrici" (quelli co-a S maiuscola) saccian intervegnî, corezzendo i sbagli e sanando e omiscioin de un semplice "appascionou da stöia"».